

Na temelju članka 19. stavak (2) Zakona o Vladi Federacije Bosne i Hercegovine ("Službene novine Federacije BiH", br. 1/94, 8/95, 58/02, 19/03, 2/06 i 8/06), članka 4. alineja 4. i članka 10. Zakona o kontroli cijena ("Službene novine Federacije BiH", br. 2/95 i 70/08), Vlada Federacije Bosne i Hercegovine na 261. sjednici, održanoj 01.04.2021. godine, donosi

ODLUKU

O PROPISIVANJU MJERE NEPOSREDNE KONTROLE CIJENA UTVRĐIVANJEM MAKSIMALNE VISINE MARŽI ZA POJEDINE OSNOVNE ŽIVOTNE NAMIRNICE I DRUGE PROIZVODE

I.

Ovom odlukom utvrđuje se postojanje uvjeta za propisivanje mjere neposredne kontrole cijena na teritoriju Federacije Bosne i Hercegovine.

II.

Kao mjeru neposredne kontrole cijena iz točke I. ove odluke, Vlada Federacije Bosne i Hercegovine propisuje za pojedine osnovne životne namirnice i druge proizvode utvrđivanje maksimalne visine marži u trgovini (kalkulativne cijene).

III.

Mjera neposredne kontrole cijena iz točke II. ove odluke odnosi se na proizvode u nadležnosti Federacije Bosne i Hercegovine, kantona, grada i općine propisane odredbama Zakona o kontroli cijena, kao i na ostale životne namirnice i druge proizvode koje prodaju svi učesnici u lancu snabdijevanja, odnosno gospodarska društva i druga pravna i fizička lica koja proizvode i obavljaju trgovinu na veliko i trgovinu na malo.

IV.

Pravne i fizička lica iz točke III ove odluke obavezna su utvrditi i primjenjivati marže tako da iste u veleprodaji ne prelaze maksimalnu visinu od 6% i u maloprodaji maksimalnu visinu od 8% na nabavnu cijenu.

Obveza iz stavka (1) ove točke odnosi se na slijedeće proizvode:

- 1) sve vrste brašna, sve vrste kruha, peciva i drugih pekarskih proizvoda od brašna žitarica,
- 2) aktivni kvasac,
- 3) mlijeko i mliječne prerađevine,
- 4) jaja i proizvodi od jaja,
- 5) šećer,
- 6) čaj,
- 7) začini,
- 8) so za ljudsku ishranu,
- 9) riža,
- 10) tjestenina,
- 11) biljne i životinjske masnoće,
- 12) sve vrste svježeg mesa, ribe i njihove prerađevine,
- 13) sirće,
- 14) mesne konzerve,
- 15) riblje konzerve,
- 16) jestivo ulje,
- 17) formule za dojenčad i formule nakon dojenja,
- 18) prerađena hrana na bazi žitarica i dječija hrana za dojenčad i malu djecu,
- 19) dodaci ishrani,
- 20) dijetetski proizvodi (uključujući proizvode bez glutena),
- 21) hrana za posebne medicinske potrebe,
- 22) pelene za jednokratnu uporabu za djecu i odrasle,
- 23) higijenski ulošci,

- 24) deterdžent za veš,
- 25) deterdžent za suđe,
- 26) sapun,
- 27) pasta za zube,
- 28) toaletni papir,
- 29) sve vrste sjemenskog i sadnog materijala,
- 30) sredstva za zaštitu zdravlja biljaka,
- 31) stočna hrana i komponente za stočnu hranu i
- 32) vještačko đubrivo.

V.

Vrijednost popisanih zatečenih zaliha proizvoda iz točke IV. ove odluke i obračun nabavne cijene vrši se u skladu sa Međunarodnim računovodstvenim standardom 2-Zalihe.

VI.

Vlada Federacije Bosne i Hercegovine će u roku od 15 dana od dana stupanja na snagu ove odluke obavijestiti Parlament Federacije Bosne i Hercegovine o mjerama neposredne kontrole pojedinih životnih namirnica.

VII.

Za realizaciju i nadzor nad provođenjem ove odluke zadužuju se federalna, kantonalna, gradska i općinska tržišna inspekcija.

VIII.

Ova odluka stupa na snagu narednog dana od dana objavljivanja u "Službenim novinama Federacije BiH".

V. broj 529/2021
01. travnja 2021. godine
Sarajevo

Premijer
Fadil Novalić, v. r.